

CYNGOR SIR YNYS MÔN

Cofnodion y cyfarfod hybrid a gynhaliwyd ar 12 Medi 2023

- PRESENNOL:** Y Cynghorydd Margaret Murley Roberts (Cadeirydd)
Y Cynghorydd Glyn Haynes (Is-gadeirydd)
- Y Cynghorwyr Geraint Bebb, Non Dafydd, Paul Ellis, Jeff M Evans, Neville Evans, Douglas Massie Fowlie, T LI Hughes MBE, Llinos Medi, A M Jones, Carwyn Jones, Dyfed Wyn Jones, G O Jones, John Ifan Jones, R LI Jones, Jackie Lewis, Euryrn Morris, Pip O'Neill, Llio Angharad Owen, Gary Pritchard, Dylan Rees, Alun Roberts, Dafydd Roberts, Keith Roberts, Nicola Roberts, Ken Taylor, Dafydd Rhys Thomas, Robin Williams, Sonia Williams, Alwen Pennant Watkin, Arfon Wyn a Liz Wood
- WRTH LAW:** Prif Weithredwr,
Dirprwy Brif Weithredwr,
Cyfarwyddwr Swyddogaeth (Busnes y Cyngor)/Swyddog Monitro,
Cyfarwyddwr Swyddogaeth (Adnoddau)/Swyddog Adran 151,
Cyfarwyddwr Gwasanaethau Cymdeithasol,
Pennaeth Gwasanaethau Tai,
Pennaeth Proffesiwn (Adnoddau Dynol) a Thrawsnewid,
Pennaeth Gwasanaethau Oedolion,
Pennaeth Rheoleiddio a Datblygu Economaidd,
Pennaeth Democratiaeth,
Uwch Reolwr (Sector Uwchradd) (AE),
Rheolwr Sgrwtini (AD),
Cyfreithiwr (Llywodraethu Corfforaethol a Chontractau) (MY),
Rheolwr Busnes a Strategaeth Gwasanaeth (Priffyrdd) (GP),
Rheolwr yr Uned Cefnogi Teuluoedd (BHJ) (ar gyfer eitem 5 yn unig),
Swyddog Pwyllgorau (MEH).
- HEFYD YN BRESENNOL:** Mr Dilwyn Evans (Cadeirydd y Pwyllgor Llywodraethu ac Archwilio) (ar gyfer eitem 11 yn unig);
Mr John R Jones (Cadeirydd y Pwyllgor Safonau) (ar gyfer eitem 12 yn unig).
- YMDDIHEURIADAU:** Y Cynghorydd Derek Owen

1. COFNODION

Cadarnhawyd bod cofnodion y cyfarfodydd canlynol o'r Cyngor Sir yn gywir:-

- 23 Mai, 2023 (Cyfarfod Cyffredinol) – 10.30 a.m.
- 23 Mai, 2023 (Cyfarfod Blynyddol) – 2.00 p.m.

2. DATGAN DIDDORDEB

Bu i'r Cynghorydd Margaret M Roberts ddatgan diddordeb personol a rhagfarnus mewn perthynas ag Eitem 10 – Penodi Cynghorydd Sir i'r Pwyllgor Safonau a gadawodd y cyfarfod yn ystod y drafodaeth a'r bleidlais.

3. DERBYN UNRHYW GYHOEDDIADAU GAN Y CADEIRYDD, ARWEINYDD Y CYNGOR NEU'R PRIF WEITHREDWR

Gwnaeth y Cadeirydd y cyhoeddiadau a ganlyn:-

- Llongyfarchiadau i holl aelodau ffermwyr ifanc Môn a fu'n cystadlu yn y Sioe Fawr yn Llanelwedd.
- Llongyfarchiadau mawr hefyd i'r rhai a fu'n arddangos eu hanifeiliaid a'u cynnyrch yn y Sioe Fawr ac i Mr Richard Roberts o gwmi amaethyddol Emyr Evans am dderbyn gwobr am wasanaeth hir i'r cwmni.
- Llongyfarchiadau i bawb o'r Ynys a gymerodd ran yn yr Eisteddfod Genedlaethol ym Mhen Llŷn ym mis Awst ac yn enwedig i Gôr Ieuenctid Môn, dan arweiniad Mrs Mari Pritchard, a enillodd dri o brif wobrau corawl yr Eisteddfod.
- Llongyfarchiadau hefyd i'r rhai â chysylltiadau ag Ynys Môn a gafodd eu hurddo i'r orsedd eleni.
- Llongyfarchiadau i Ms Alison Cairns o Lannerch-y-medd am ennill y wobwr Dysgwr y Flwyddyn yn yr Eisteddfod.
- Cyfeiriodd y Cadeirydd at lwyddiant Sioe Môn eto eleni. Mynegodd ei diolch i'r Gymdeithas Amaethyddol ac i bawb a gefnogodd y sioe. Diolchodd hefyd i bawb fu ynghlwm â'r gwaith o drefnu pafiliwn y Cyngor yn y sioe.
- Dywedodd y Cadeirydd bod Ynys Môn wedi cael ei derbyn yn ddiweddar fel aelod swyddogol o Rwydwaith Byd-eang Cymunedau Oed-Gyfeillgar, Sefydliad Iechyd y Byd. Fel aelod newydd o'r rhwydwaith, mae'r Ynys yn rhan o symudiad byd-eang sydd yn ceisio creu cymunedau ble gall bawb edrych ymlaen at heneiddio'n dda ynddynt. Mynegodd ei diolch i Lywodraeth Cymru a Thîm Comisiynydd Pobl Hŷn Cymru am y gefnogaeth yn ystod y daith; Fforwm Pobl Hŷn Ynys Môn; y Cynghorydd Gwilym Jones ein Pencampwr Oed-Gyfeillgar; a staff a phartneriaid y Cyngor am eu gwaith caled.
- Llongyfarchiadau i Dîm Maethu Môn sydd wedi ennill dwy wobwr gan *Fostering Network* Prydain. Enillodd dau o ofalwyr maeth yr Awdurdod y wobwr *Kinship Carers* tra bod y Tîm Maethu wedi ennill y wobwr ar gyfer Tîm Gweithwyr Cymdeithasol.
- Llongyfarchiadau mawr i Mrs Mary Davies sydd wedi derbyn MBE am ei gwasanaeth anrhydeddus fel Ymdriniwr Galwadau gyda British Telecom a'r Gwasanaethau Brys (999).
- Llongyfarchiadau mawr i staff y Gwasanaeth Archifau, dan arweiniad Ms Kelly Parry, ar eu llwyddiant diweddar. Mae'r tîm wedi gweithio'n hynod o galed ar gyfer asesiad diweddar ac wedi sicrhau eu bod yn cadw'r statws fel Archifdy Achrededig

- Llongyfarchiadau i'r holl bobl ifanc sydd wedi llwyddo yn eu harholiadau eleni. Diolchodd y Cadeirydd i'r athrawon a'r staff yn ein hysgolion yn ogystal am gefnogi'r bobl ifanc yn ystod eu taith addysgol.

* * * *

Cydymdeimlwyd â Mrs Sharon Warnes, aelod annibynnol o'r Pwyllgor Safonau a'r Pwyllgor Llywodraethu ac Archwilio, ar golli ei gŵr yn ddiweddar.

Cydymdeimlwyd â'r cyn-gynghorydd John Griffith, ar golli ei wraig yn ddiweddar.

Cydymdeimlwyd â Mr Arwel Owen, Pennaeth Gwasanaethau Oedolion, ar golli ei dad yn ddiweddar.

Cydymdeimlwyd hefyd ag unrhyw Aelod neu aelod o staff y Cyngor a oedd wedi cael profedigaeth yn ddiweddar.

Cafwyd munud o dawelwch a safodd yr Aelodau a Swyddogion fel arwydd o barch.

4. CYFLWYNO DEISEBAU

Dim wedi'u derbyn.

5. ASESIAD DIGONOLRWYDD GOFAL PLANT

Cyflwynwyd adroddiad y Cyfarwyddwr Gwasanaethau Cymdeithasol fel y'i cyflwynwyd i'r Pwyllgor Gwaith ar 27 Mehefin, 2023 i'w dderbyn gan y Cyngor.

Dywedodd Arweinydd y Cyngor bod yr Asesiad Digonolrwydd Gofal Plant yn asesiad statudol sy'n nodi'r amcanion allweddol a fydd yn helpu i gefnogi twf a chadw darparwyr Gofal Plant ar yr Ynys i sicrhau sector gofal plant cynaliadwy sy'n cynnig cyfleoedd datblygu sylfaenol i blant gan gefnogi rhieni/gofalwyr i weithio. Diolchodd i staff y Gwasanaeth a'r partneriaid sy'n gysylltiedig â'r ddarpariaeth gofal plant ar Ynys Môn.

PENDERFYNWYD yn unfrydol i dderbyn yr Asesiad Digonolrwydd Gofal Plant 2022, y Cynllun Gweithredu Digonolrwydd Gofal Plant a'r adroddiad cynnydd blynyddol fel rhan o'r Fframwaith Polisi (paragraff 3.2.2.1.1. yn y Cyfansoddiad) ac yna i Lywodraeth Cymru.

6. HUNAN ASESIAD CORFFORAETHOL 2023

Cyflwynwyd adroddiad y Pennaeth Proffesiwn (Adnoddau Dynol) a Thrawsnewid i'w dderbyn gan y Cyngor.

Dywedodd yr Aelod Portffolio Corfforaethol a Phrofiad Cwsmer bod yr adroddiad yn adlewyrchu ail hunanasesiad y Cyngor yn dilyn mabwysiadu'r cyntaf ym mis Medi, 2022 yn unol â gofynion Deddf Llywodraeth Leol ac Etholiadau (Cymru) 2021. Mae'r adroddiad yn tystiolaethu allbwn fframwaith cynllunio corfforaethol a rheoli perfformiad y Cyngor ac yn ddiweddglo proses sy'n dwyn ynghyd amryw o wahanol agweddau.

PENDERFYNWYD yn unfrydol i:-

- Gytuno â'r addasiadau a awgrymwyd gan y Pwyllgor Llywodraethu ac Archwilio ac awdurdodi swyddogion i ddiwygio'r drafft terfynol o'r Aseiad Corfforaethol ar gyfer 2023;

- Mabwysiadu'r Hunanasesiad Corfforaethol ar gyfer 2023 yn ffurfiol;

- Cytuno ei fod yn cael ei anfon at y rhestr ganlynol o dderbynwyr o fewn y cyfnod o bedair wythnos yn dilyn y cyfarfod hwn fel sy'n ofynnol o dan Ddeddf Llywodraeth Leol ac Etholiadau (Cymru) 2021:-

- Archwilydd Cyffredinol Cymru;

- Prif Arolygydd Ei Mawrhydi dros Addysg a Hyfforddiant yng Nghymru, a

- Gweinidogion Cymru.

7. YMESTYN CYLCH GORCHWYL Y PWYLLGOR GWASANAETHAU DEMOCRATAIDD

Cyflwynwyd adroddiad gan y Cyfarwyddwr Swyddogaeth (Busnes y Cyngor)/Swyddog Monitro, fel y'i cyflwynwyd i'r Pwyllgor Gwasanaethau Democrataidd ar 28 Mehefin, a'r Pwyllgor Gwaith ar 18 Gorffennaf, 2023 i'w dderbyn gan y Cyngor.

Dywedodd yr Aelod Portffolio Corfforaethol a Phrofiad Cwsmer yn achos rhai materion, sy'n debygol o arwain at newidiadau cyfansoddiadol a fydd yn cael eu cymeradwyo gan y Cyngor llawn, mae'n bwysig bod yr opsiynau, manteision ac anfanteision yn cael eu trafod yn fanwl cyn y gwneir penderfyniad. O dan y trefniadau presennol nid yw'n bosib trafod materion mewn llawer o fanylder yng nghyfarfodydd y Cyngor llawn. Felly, dan yr amgylchiadau hyn, cynigir bod y Pwyllgor Gwasanaethau Democrataidd yn gwneud y gwaith hwn ar ran y Cyngor a'i fod hefyd yn ymateb i ymgynghoriadau yn ymwneud â materion cyfansoddiadol. Mae'r opsiynau eraill yn cynnwys sefydlu grŵp gorchwyl a gorffen unigol ar gyfer pob darn o waith, neu sefydlu is-bwyllgor sefydlog o'r Cyngor. Fodd bynnag, gan fod y Pwyllgor Gwasanaethau Democrataidd yn ofyniad statudol, yn bwyllgor â chydbwysedd gwleidyddol a gan fod y cynnig yn cydweddu'n dda â'i rôl statudol, awgrymir mai newid cylch gorchwyl y Pwyllgor Gwasanaethau Democrataidd yw'r ateb mwyaf ymarferol ac effeithiol. Ni fydd pob newid cyfansoddiadol yn cael ei ystyried neu ei drafod gan y Pwyllgor Gwasanaethau Democrataidd; bydd hynny'n digwydd dim ond pan fydd angen trafodaeth neu benderfyniad ar ddewis lleol neu er mwyn cytuno ar ymateb i unrhyw ymgynghoriad ar faterion sy'n effeithio ar Gyfansoddiad y Cyngor. Y Swyddog Monitro, gyda chytundeb Cadeirydd y Pwyllgor, fydd yn penderfynu a fydd mater penodol yn cael ei adolygu gan y Pwyllgor ai peidio. Bydd gan y Pwyllgor Gwasanaethau Democrataidd y pŵer i gyflwyno argymhellion i'r Cyngor mewn perthynas â'r materion hyn yn unig ac ni fydd ganddo'r pŵer i wneud y newidiadau y mae'n eu hargymell.

PENDERFYNWYD yn unfrydol i ymestyn cylch gorchwyl y Pwyllgor Gwasanaethau Democrataidd i gynnwys y cynnig fel y nodir yn yr adroddiad, a bod Cyfansoddiad y Cyngor yn cael ei ddiwygio yn sgil y newid hwn.

8. CYNLLUN RHEOLI ARDAL O HARDDWCH NATURIOL EITHRIADOL (AHNE) – DRAFFT TERFYNOL

Cyflwynwyd adroddiad gan y Pennaeth Rheoleiddio a Datblygu Economaidd, fel y'i cyflwynwyd i'r Pwyllgor Gwaith ar 18 Gorffennaf 2023 i'w dderbyn gan y Cyngor.

Rhoddodd yr Aelod Portffolio Hamdden, Twristiaeth a Morwrol amlinellid o'r cefndir a'r gofynion statudol ar awdurdodau lleol sy'n gweinyddu AHNEoedd yn cynnwys paratoi a chyhoeddi cynlluniau rheoli ar gyfer eu hardal a'u hadolygu pob pum mlynedd. Mae'r Cynllun Rheoli AHNE yn ddogfen eang ac mae'n cyd-fynd yn llawn â Chynllun newydd y

Cyngor, a bydd yn helpu i gyflawni'r chwe blaenoriaeth allweddol yng Nghynllun y Cyngor. Mae'r Cynllun Rheoli hefyd yn cyd-fynd â Chynllun Cyrchfan y Cyngor. Mae hefyd yn hanfodol i'r bobl, cymunedau a busnesau o fewn yr AHNE sydd yn dirwedd ddynamig a gweithredol yn ogystal ag ardal o harddwch naturiol eithriadol gyda'i rhinweddau arbennig. Nododd bod pum thema allweddol o fewn y Cynllun Rheoli ar gyfer 2023-2028 sef cyfoethogi cefn gwald a chymeriad yr arfordir; mynd i'r afael â'r argyfwng natur; yr AHNE fel lle i fwynhau a dysgu; cymunedau bywiog mewn tirwedd weithredol a rheoli'r AHNE mewn hinsawdd sy'n newid. Aeth ymlaen i ddweud bod y Cynllun Rheoli wedi bod drwy broses ymgynghori ac i'r Pwyllgor Sgriwtini perthnasol.

Dyweddodd y Cynghorydd Robert Ll Jones er ei fod yn croesawu'r Cynllun Rheoli Ardal o Harddwch Naturiol Eithriadol, ei bod hi'n bwysig diogelu anghenion cymunedau lleol o fewn yr AHNE gan fod tai yn cael eu codi a choed yn cael eu torri o fewn yr AHNE.

PENDERFYNWYD yn unfrydol i gymeradwyo'r Cynllun Rheoli Ardal o Harddwch Naturiol Eithriadol newydd ar gyfer 2023 – 2028.

9. MABWYSIADU CYNLLUN DEISEBAU DRAFFT

Cyflwynwyd adroddiad gan y Cyfarwyddwr Swyddogaeth (Busnes y Cyngor)/Swyddog Monitro, fel y'i cyflwynwyd i'r Pwyllgor Gwaith ar 18 Gorffennaf, 2023 i'w dderbyn gan y Cyngor.

Dyweddodd yr Aelod Portffolio Corfforaethol a Phrofiad Cwsmer bod Adran 42 o Ddeddf Llywodraeth Leol ac Etholiadau (Cymru) 2021 yn gosod dyletswydd ar brif gynghorau i baratoi a chyhoeddi Cynllun Deisebau. Cyhoeddwyd y Canllawiau drafft perthnasol ym mis Ebrill 2023. Mae'r Cynllun hwn yn ychwanegol at drefniadau presennol Rheolau Gweithdrefnau'r Cyngor sy'n galluogi aelodau etholedig i gyflwyno deisebau yng nghyfarfodydd y Cyngor. Mae'r Cynllun, yn Atodiad 1 yr Adroddiad, yn bodloni'r gofynion statudol newydd ac mae hefyd yn cynnwys rhai elfennau sy'n fater o ddewis lleol. Trafodwyd y rhain gyda'r Tîm Arweinyddiaeth, Penaethiaid Gwasanaeth, swyddogion perthnasol eraill ac Arweinyddion Grwpiau. Bydd deisebau dilys yn cael eu cyhoeddi ar wefan y Cyngor. Bydd deisebau electronig hefyd yn cael eu cyhoeddu ar wefan y Cyngor gan ddefnyddio'r meddalwedd Modern.Gov sy'n cefnogi'r system bwyllgorau. Mae'r cynllun yn nodi'r broses ar gyfer cyflwyno deisebau i'r Cyngor a sut y byddant yn cael eu trin ac mae hefyd yn nodi'r amgylchiadau pryd y bydd deisebau'n cael eu gwrthod. Bydd y cynllun yn cael ei weithredu a'i reoli gan y Gwasanaethau Democrataidd a gyda chytundeb y Cyngor bydd yn cael ei adolygu gan y Pwyllgor Gwasanaethau Democrataidd ar ôl bod yn weithredol am 12 mis.

PENDERFYNWYD yn unfrydol i:-

- Fabwysiadu'r Cynllun Deisebu Drafft;
- Caniatáu i'r Swyddog Monitro addasu Cyfansoddiad y Cyngor er mwyn ymgorffori'r Cynllun;
- Rhoi awdurdod i'r Swyddog Monitro wneud addasiadau bach i'r Cynllun, er mwyn sicrhau y gellir ei weithredu'n ddidrafferth, a bydd unrhyw newidiadau materol yn cael eu hawdurdodi gan y Cyngor llawn yn unig;
- Caniatáu i'r Pennaeth Democrataidd weithredu'r Cynllun cyn gynted â phosibl, a sicrhau y dilynir y camau priodol i hyrwyddo'r Cynllun i'r cyhoedd;
- Gofyn i'r Pennaeth Democrataidd baratoi adroddiad i'r Pwyllgor Gwasanaethau Democrataidd ar weithrediad y Cynllun cyn gynted â phosibl 12 mis ar ôl y dyddiad gweithredu.

10. PENODI CYNGHORYDD SIR I'R PWYLLGOR SAFONAU

Cyflwynwyd adroddiad gan y Cyfarwyddwr Swyddogaeth (Busnes y Cyngor)/Swyddog Monitro i'w dderbyn gan y Cyngor.

Dywedodd yr Aelod Portffolio Corfforaethol a Phrofiad Cwsmer bod sedd wag ar y Pwyllgor Safonau yn dilyn ymddiswyddiad un o'r Cynghorwyr Sir. Nododd bod penodi aelod etholedig o'r Cyngor Sir ar y Pwyllgor Safonau yn benderfyniad i'r Cyngor llawn. Yn unol â'r gofynion deddfwriaethol ar gyfer Pwyllgorau Safonau nid yw'n bwyllgor sy'n denu cydbwysedd gwleidyddol; ni chaniateir i fwy nag un aelod o'r Pwyllgor Gwaith gynrychioli'r aelodau etholedig ar y Pwyllgor Safonau; ni chaniateir i Arweinydd y Cyngor fod yn aelod o'r Pwyllgor Safonau.

Cynigodd Arweinydd y Cyngor benodi'r Cynghorydd Margaret M Roberts i gynrychioli'r Cyngor Sir ar y Pwyllgor Safonau. Eiliwyd y cynnig gan y Cynghorydd Nicola Roberts.

Dywedodd y Cynghorydd Jeff Evans ei fod yn siomedig nad oedd y Pwyllgor Safonau'n bwyllgor â chydbwysedd gwleidyddol gan y byddai hynny'n caniatáu i'r Pwyllgor yn agored a thryloyw.

PENDERFYNWYD penodi'r Cynghorydd Margaret Murley Roberts fel aelod etholedig o'r Cyngor Sir ar y Pwyllgor Safonau.

(Fe wnaeth y Cynghorwyr Paul Ellis, Jeff Evans, Douglas Fowlie, Aled M Jones, R LI Jones a Liz Wood atal eu pleidlais)

11. ADRODDIAD BLYNYDDOL Y PWYLLGOR LLYWODRAETHU ARCHWILIO 2022-23 – ADRODDIAD Y CADEIRYDD

Cyflwynwyd adroddiad gan Y Pennaeth Swyddogaeth (Adnoddau)/Swyddog Adran 151 fel y'i cyflwynwyd i'r Pwyllgor Llywodraethu ac Archwilio ar 29 Mehefin, 2023 i'w dderbyn gan y Cyngor.

Cyflwynwyd Adroddiad Blynyddol y Pwyllgor Llywodraethu ac Archwilio ar gyfer 2022/2023 gan Mr Dilwyn Evans, Cadeirydd y Pwyllgor Llywodraethu ac Archwilio.

Dywedodd Cadeirydd y Pwyllgor Llywodraethu ac Archwilio bod y Pwyllgor yn elfen allweddol o fframwaith llywodraethu'r Cyngor. Ei swyddogaeth yw darparu adnodd annibynnol a lefel uchel i gefnogi llywodraethu da a rheolaeth ariannol gyhoeddus gref. Nododd bod y dogfennau yn yr Adroddiad Blynyddol yn cyfeirio at y modd y mae'r Pwyllgor wedi cyflawni ei ddyletswyddau yn ystod 2022/2023 er mwyn adrodd i'r rheiny sy'n gyfrifol am lywodraethiant h.y. y Cyngor Sir. Rôl y Pwyllgor Llywodraethu ac Archwilio yw cael sicrwydd bod systemau rheoli mewnol y Cyngor yn gweithio a bod risgiau'n cael eu rheoli'n effeithiol, yn hytrach na chraffu ar weithgareddau.

PENDERFYNWYD yn unfrydol i gymeradwyo Adroddiad Blynyddol y Pwyllgor Llywodraethu ac Archwilio ar gyfer 2022/2023.

12. ADRODDIAD BLYNYDDOL Y PWYLLGOR SAFONAU

Cyflwynwyd adroddiad gan y Cyfarwyddwr Swyddogaeth (Busnes y Cyngor)/Swyddog Monitro, fel y'i cyflwynwyd i'r Pwyllgor Safonau ar 14 Gorffennaf, 2023 i'w dderbyn gan y Cyngor.

Cyflwynwyd Adroddiad Blynyddol y Pwyllgor Safonau gan Mr John R Jones, Cadeirydd y Pwyllgor Safonau.

Dywedodd Mr Jones mai dyma ail adroddiad blynyddol y Pwyllgor Safonau i'r Cyngor Sir, yn unol â gofyniad Deddf Llywodraeth Leol ac Etholiadau (Cymru) 2021. Aeth ymlaen i ddweud bod yr adroddiad yn amlinellu'r dyletswyddau a gyflwynwyd dan y Ddeddf a'r gwaith a gwblhawyd gan y Pwyllgor Safonau i fynd i'r afael â phrif ddarpariaethau'r Ddeddf. Dywedodd Mr Jones bod dyletswydd newydd wedi cael ei rhoi ar Arweinwyr Grŵp i gymryd camau rhesymol i hybu a chynnal safonau ymddygiad uchel gan Aelodau'r Grŵp. Mae gan y Pwyllgor Safonau ddyletswydd newydd i fonitro sut y mae'r Arweinwyr Grŵp yn cydymffurfio â'r ddyletswydd newydd hon ac i ystyried sut y mae'n sicrhau ei fod yn bodloni'r gofyniad i ddarparu cyngor a hyfforddiant i'r Arweinwyr Grŵp. Dywedodd Mr Jones bod yr adroddiad yn amlinellu'r gwaith a gwblhawyd gan y Pwyllgor yn unol â'i gyfrifoldebau yn ystod 2022/2023 a chyflwynwyd y Rhaglen Waith ar gyfer 2023/2024 i'w chymeradwyo gan y Cyngor.

PENDERFYNWYD:-

- **Cymeradwyo Adroddiad Blynyddol y Pwyllgor Safonau;**
- **Cymeradwyo Rhaglen Waith y Pwyllgor Safonau ar gyfer 2023/24, gan dderbyn y gallai materion ychwanegol gael eu cynnwys, yn unol â'r galw.**

(Fe wnaeth y Cynghorwyr Paul Ellis, Douglas Fowlie, Aled M Jones, a Liz Wood atal eu pleidlais)

13. ADRODDIAD BLYNYDDOL TROSOLWG A SGRIWTINI 2022/23

Cyflwynwyd adroddiad gan Gadeiryddion y Pwyllgor Sgriwtini Corfforaethol a'r Pwyllgor Sgriwtini Partneriaeth ac Adfywio i'w dderbyn gan y Cyngor.

Rhoddodd y Cynghorydd Dylan Rees, Cadeirydd y Pwyllgor Sgriwtini Partneriaeth ac Adfywio a'r Cynghorydd Robert Ll Jones, Cadeirydd y Pwyllgor Sgriwtini Corfforaethol (hyda at fis Mai 2023) drosolwg o waith y ddau bwyllgor sgriwtini rhwng mis Mai 2022 a mis Mai 2023.

Dywedodd y Cynghorydd Dylan Rees bod Cadeiryddion y ddau Bwyllgor Sgriwtini wedi arwain y gwaith o ddatblygu'r Blaen Raglenni Gwaith sy'n cael eu cymeradwyo ym mhob cyfarfod o'r Pwyllgorau Sgriwtini. Aeth ymlaen i ddweud bod effaith a gwerth ychwanegol y gweithgareddau sgriwtini'n cyfrannu at flaenoriaethau corfforaethol y Cyngor drwy gefnogaeth a her. Nodwyd bod angen penodi Pencampwr Sgriwtini. Mae gan y Pencampwr Sgriwtini rôl bwysig o ran hyrwyddo'r swyddogaeth trosolwg a sgriwtini yn y Cyngor a gyda phartneriaid allanol yr Awdurdod. Mae'r rôl yn cael ei rhannu rhwng y ddau gadeirydd sgriwtini bob yn ail.

PENDERFYNWYD yn unfrydol i:-

- **Gymeradwyo'r Adroddiad Blynyddol Trosolwg a Sgriwtini ar gyfer 2022/23;**
- **Nodi'r cynnydd parhaus sy'n cael ei wneud o ran ein siwrnai ddatblygu Sgriwtini a'r effaith y mae hyn yn ei gael ar ymarfer.**
- **Penodi Cadeirydd y Pwyllgor Sgriwtini Partneriaeth ac Adfywio yn Bencampwr Sgriwtini ar gyfer y cyfnod Mai 2023 i Mai 2024.**

Daeth y cyfarfod i ben am 3.15 pm

**Y CYNGHORYDD MARGARET M ROBERTS
CADEIRYDD**